

正定府志卷之四十八

藝文五

書

啟

考

辨

書

報燕惠王書

周

樂毅

謝樂間書

燕惠王

答元侍御書

唐

韓愈

與李勃書

田宏正

啟

鎮府謝兩府啟

宋

宋祁

致

冶河攷

明王禕

冶河攷

趙文奎

淮陰侯背水陣故址考

國朝吳楠

贊皇本漢房子縣攷

黃崗竹

辨

行唐非奚子國辨

國朝張振義

無極非極國辨

黃可潤

說

修學說

國朝林華皖

夢樹說

黃可潤

石家莊蓮說

黃可潤

文

弔樂毅墓文

唐柳宗元

祭韓侯文

明趙輔

贊

魏鄭公徵贊

唐呂溫

熱菴安先生像贊

元歐陽元

忠烈公董文炳贊

明宋濂

賦

隄光武渡滹沱冰合賦

唐獨孤及

滹沱河賦

明石瑤

登封龍山賦

石瑤

西池賦

劉瑩

試雨亭賦

國朝黃可潤

書

報燕惠王書

依通志字句稍節

周樂毅

臣不佞不能奉承王命以順左右之心恐傷先王之
明有害足下之義故逃遁走趙今足下使人數之以
罪臣恐侍御者不察先王所以畜幸臣之理又不白
臣之所以事先王之心故敢以書對臣聞賢聖之君
不以祿私親其功多者賞之其能當者處之故察能
而授官者成功之君也論行而結交者立名之士也
臣竊觀先王之舉也見有高世主之心故假節於魏
以身得察於燕先王過舉廁之賓客之中立之羣臣

之上不謀父兄以爲亞卿臣竊不自知自以爲奉令承教可幸無罪故受命而不辭先王命之曰我有積怨深怒於齊不量輕弱而欲以齊爲事臣曰夫齊霸國之餘業而最勝之遺事也練於甲兵習於戰攻王若欲伐之必與天下圖之與天下圖之莫若結於趙且又淮北宋地楚衛之所欲也趙若許而約四國攻之齊可大破也先王以爲然具符節南使臣於趙顧反命起兵擊齊以天之道先王之靈河北之地隨先王而舉之濟上濟上之軍受命擊齊大敗齊人輕卒銳兵長驅至國齊王遁而走莒僅以身免珠玉財寶

車甲珍器盡收入於燕齊器設於寧臺大呂陳於元
英故鼎反乎磨室薊邱之楹植於汶篁自五霸以來
功未有及先王者也先王以爲慊於志故裂地而封
之使得比小國諸侯臣竊不自知自以爲奉命承教
可幸無罪是以受命不辭臣聞賢聖之君功立而不
廢故著於春秋蚤知之士名成而不毀故稱於後世
若先王之報怨雪耻夷萬乘之強國收八百歲之蓄
積及至棄羣臣之日餘教未衰執政任事之臣修法
令慎庶孽施及乎萌隸皆可以教後世臣聞之善作
者不必善成善始者不必善終昔伍子胥諫聽於闔

閭而吳王遠迹至郢夫差弗是也賜之鵠夷而淨之
江吳王不寤先論之可以立功故沉子胥而不悔子
胥不蚤見主之不同量是以及至於入江而不化夫免
身立功以明先王之迹臣之上計也離毀辱之誹謗
墮先王之名臣之所大恐也臨不測之罪以幸爲利
義之所不敢出也臣聞古之君子交絕不出惡聲忠
臣去國不潔其名臣雖不佞數奉教於君子矣恐侍
御者之親左右之說不察疏遠之行故敢獻書以聞
惟君王之留意焉

謝樂間書

燕惠王

寡人不佞不能奉順君意故君捐國而去則寡人之不肖明矣敢端其願而君不肯聽故使使者陳愚意君試論之語曰仁不輕絕智不輕怨君之於先王也世之所明知也寡人望有非則君掩蓋之不虞君之明罪之也望有過則君教誨之不虞君之明棄之也且寡人之罪國人莫不知天下莫不聞君微出明恕以棄寡人寡人必有罪矣雖然恐君之未盡厚也諺曰厚者不毀人以自益也仁者不危人以要名也故掩人之邪者厚人之行也救人之過者仁者之道也

世有掩寡人之邪救寡人之過非君孰望之今君厚受位於先王以成尊輕棄寡人以快心則掩邪救過難得於君矣且世有薄而故厚施行有失而故惠用今使寡人任不肖之罪而君有失厚之累亦惟君擇之也無所取之國之有封疆家之有垣墻所以合好掩惡也室不能相和出語鄰家未爲通計也怨惡未見而明棄之未爲盡厚也寡人雖不肖乎未如殷紂之亂也君雖不得意乎未如商容箕子之累也然則不內蓋寡人而明怨於外恐其適足以傷於高而薄於行也非然也苟以明君之義成君之高雖任惡者

不難受也本欲以爲明寡人之薄而君不得厚揚寡人之辱而君不得榮此一舉而兩失也義者不虧人以自益況傷人以自損乎君無以寡人不肖累往事之美昔者柳下惠吏於魯三黜而不去或謂之曰可以去柳下惠曰苟與人之異惡往而不黜乎猶且黜乎寧於故國爾柳下惠不以三黜自累故前業不忘不以去爲心故遠近無議今寡人之罪國人未知而議寡人者徧天下語曰論不修心議不累物仁不輕絕智不簡功簡棄大功者輟也輕絕厚利者怨也輟而棄之怨而累之宜在遠者不望之乎君也今以寡

人無罪君豈怨之乎願君捐怨追惟先王復以教寡
人意君曰余且慝心以成而過不顧先王以明而惡
使寡人進不得修功退不得改過君之所揣也唯君
圖之此寡人之愚意也敬以書謁之

間樂毅之
子靈壽人

答元侍御書

唐韓愈

九月五日愈頓首微之足下前歲辱書論甄逢父濟
識安祿山必反卽詐爲暗棄去祿山反有名號又逼
致之濟死執不起卒不汙祿山父子事又論逢知讀
書刻身厲行勤已取足不干州縣斥其餘以救人之
急足下繇是與之交欲令逢父子名迹存諸史氏足
下以抗直喜立事斥不得立朝失所不自悔喜事益
堅微之乎子真安而樂之者謹詳足下所論載校之
史法若濟者固當得附書今逢又能行身幸於方州
大臣以標白其先人事載之天下耳固微之天子追

爵其父第四品赫然驚人逢與其父俱當得書矣濟
逢父子自吾人發春秋美君子樂道人之善夫苟能
樂道人之善則天下皆去惡爲善善人得所其功實
大足下與濟父子俱宜牽聯得書足下勉逢令終始
其躬而足下年尙彊嗣德有繼將大書特書屢書不
一書而已也愈旣承命又執筆以俟愈再拜

與李渤書

田宏正

宏正珍重執事之心積二十餘年竟不獲自道於執事者徒懇終日常恐空老而無所師承固內自不安矣自前年朝謁得展拜執事於道路之間時苦牽復畧不得伸前時所畜之意彌有不足於心矣執事以古今仁義發爲懲惡勸善之心其惟當世士君子所賴抑亦姬公孔子之心待執事而明白之矣每覽前後史策紀其所爲占之賢者有出無愧矣宏正近奉制書去魏鎮自念寵榮已極能無愧惕之甚哉且自二寇亂常以來六十餘載矣河北之地教化之所不

行冀趙魏常山又河北之尤者日月積習遂爲匪人
誠可悲矣寢食常念之以爲負經濟不羈之才者執
事可以將朝廷之化移獷俗之心矣宏正庸虛輒不
自意思君子降重爲邑人啓茅塞之心仰執事坐師
氏之筵使鄙夫修擁篲之禮則向之羞姑可掩矣不
審執事當俯而就之乎復耻而不就乎今輒虛上倅
之位俟君子光臨古人有功成不居退得所詣者鄙
人詠之久矣儻終不拒至誠之情幸甚

啟

鎮府謝兩府啟

宋 宋 祁

常山劇部全趙故封地聯六州身擁三綬任踰於分
榮不償慚伏念祁爲術空單稟生虺怯叨華禁署謬
籍經筵惟孤拙以自持無游說而爲助年將壯邁疾
引衰來遂丐外除冀逃多悔國有賢翰朝無廢人料
自閑州受以戎閫因過都而俾謁緣重帥而許遷敢
留於行已踐而職此蓋伏蒙某官助邦蓋有爲上亟
言齒擢誤加庸底思報竊以河朔之地天下勁兵分
四帥臣皆一都會然而狃承平之習訓練弗脩因流